


Matyu 26




Ito ennem
nga algew
sacbay nito
Padaya Nitatalib,
nawé ngé Jèsus ka
Bétanya. Itu ya ili né
Lasaru, nga igina to lalaki nga
pinagungar né Jèsus itun. Ket to
Marya, namet itun ka isa
nga butilya nga
bangbanglu nga para labu.
Isa nga litru nga bangbanglu nga
naggayat ka mula nga nardu ya
mayan na, ket nangina nga unay, ta
tutu nga awan lauc na.

1

Ket
nibucbuc na
met to
bangbanglu kadiya
saka né Jèsus, sé na
nipunas met ya ebbuc
na kadiya saka na.
Binumngaay ngarud ya ellab
nito bangbanglu ito baley.

2

Ket é Hudas Iskariyuté, nga isa kadito sangapulu ket duwa nga adalan, nawé itun kadito pangpangulu diya agsirbirbi iya Témplu, tasun makitulag nga iyawat na ngé Jésus igida.




3

Ket naragsakan da ngarud ito nagicna da to nibaga né Hudas, ket kinariyan da nga écdan da kanu ka kuwarta. Ket nagsicsiim ngarud ngé Hudasin ka mayat nga gundaway na nga mangiyawat é Jésus igida.




4

Ket tinungpal ngarud dito adalan to nibilin né Jésus. Ket iya agten iyan, nisagana da ya panggidam da nga panangilagip da ito Nitatalib. Ket ito mangmangan da pekkem, namet ngé Jésus ka tinapay, ket nagyaman é Apu Diyus ka kararag. Pinisepisey na to tinapay, sé na nécdé kadito adalan, nga kinunen na, “Alac nu yani, sé kanen nu. Idi ya beggic,” kunen na.



5

Ket kalpasan na, namet pé ngé Jésus ka paginuman. Nagkararag manin nga nagyaman é Apu Diyus, sé na nécdé igida, nga kinunen na, “Uminum kayu kuma nga amin idi. Ta idi ya dagac, nga itu ya mangpalagda iya tulag né Apu Diyus. Maiyayus ya dagac nga agpaay kadiya adu nga toltoley, tasun mapakawan diya basbasul da.”



6

Ket kinunen né Jésus é Pédru, “Ay, Simon, denggem yani nga ibagac ikew: Napalubusan ngé Satanas nga mangrribuc dakayu, nga maiyarig iya panagisap ka beggas tasun maisibna ya nabaru iya bekken nga nabaru. Ngem nikararagan naka é Apu Diyus, Pédru, tasun madi kuma mapukaw ya panamatim. Ket no sumoli nad ikew ya nabileg nga panamatim iyaken, masapul nga ikew mettas ya mangpabileg kadiya padam nga adalan,” kunen na.



7

Ket kinunen ngarud né Pédru igina, “Apu, sisasagana ngac met nga maibulun ikew, orey iya pagbaludan winno iya pakatayan,” kunen na. Ngem kinunen né Jésus, “Ya kinapudnu na, Pédru, ita mettas nga gabi, sacbay niya panagtataraut diya kawitan no parbangun, namétlu nac nad met nga nilibac kin, nga kunem nad nga madi nac em-emmu,” kunen na.



8

Ket itun, nagbubulun dé Jêsus dito adalan na nga nawé da iya isa nga lugar nga managan ka Gêtsémani. Ket kinunen na kadito adalan na, “Agtugew kayu was idi, ta mawé yac agkararag antuni,” kunen na. Ket kinunen na iya kararag na, “Ama! Amac! Mabalinam ya amin.”



9

“Ipac mu kuma yani nga panagsagaba nga lak-amec, nga rigat nga arig nga inumec. Ngem bekken kuma ngarud nga ya tarigagay ku ya matungpal, no di lugud ya tarigagay mu,” kunen na.




10

Ket iya agten iyan, nawé to Hudas antuni nga nibagnus na ya isa nga bungguy diya suldadu sé duduma nga guwardiya niya Têmplu nga eb-ebbonen dito pangpangulu diya agsirsirbi iya Têmplu sé dito Parisiyu. Nagtagi-dilag sé nagtagi-armas da met nga nawé.



11

Ket kinteb ngarud mettin nito isa igida ya tagabu nito kangatuwan nga agsirsirbi iya Têmplu, ket napéngas met to diwanan nga tinga nito tagabu win. Ngem kinunen né Jêsus, “Bay-an tida ya agten iyan!” kunen na. Ket sinécdéng na ya natalingu nga tinga nito tagabu, ket pinalaing nan.




12

Ket tinkem da ngarud ngé Jêsusin, nga nipen da iya baley nito kangatuwan nga agsirsirbi iya Têmplu. Ket é Pédru, tinumtumneb met igina. Ket dito uwed iya emwag nito baley, nagapuy da ka paginuduwan da iya tengnga nito emwag, ket nagtugtugew da ngarud iyanin. Ket é Pédru, nawé pé nakitugew igida.




13

Ket uwed pé isa nga toley antuni nga isa kadito tagabu nito kangatuwan nga agsirsirbi iya Têmplu. Ket to tagabu, kabagiyán met nito lalaki nga pinéngas né Pédru to tinga na itun. Ket dinamag pé nito tagabu é Pédru nga kinunen na, “Bekken kad nga ikew to nasingec nga kabulun né Jêsus enna minuyungan?” kunen na.




14

Ngem naglibac manin ngé Pédro, ket pag-isu nga nagtaraut mettin ya isa nga kawitan. Ket rinumwar ngarud ngé Pédro iyan, ket nagberrit ka napalausín.



15

Ket itun, amin dito pangpangulu nga naur-urnung iyan, nawé da nipen ngé Jésus iya edyan nito Gubérnador Pilatu. Ket é Pilatu, sinaludsud na ngarud é Jésus, “Tutu kad nga ikew ya Ari diya Hudyu?” kunen na. Ket kinunen né Jésus igina, “Nakagi mun,” kunen na.




16

Ngem é Jésus met ya gabay né Pilatu nga iruwar. Itu nga binaliwan na ngarud manin to kinagi na kadito toltoley. Ngem dito toltoley, nip-ipkaw da manin nga kinunen da, “Pailansam! Pailansam ka krus!” kunen da.



17

Ket iya agten iyanin, niyawat né Pilatu ngé Jésus igidan tasun mailansa ka krus. Ket itun, nimet da ngarud ngé Jésus, sé da niruwar iya siyudad nga Héruusalém, nga bugbugtungen na met ya krus na. Ket nipen da iya lugar nga maawagan ka Gulguta, nga itu ya kagi Hébríyu nga kayat na nga kagiyen, “Edyan Bangabanga.”




18

Ket antuni nin to nangilansaan da igina ka krus. Ket uwed met pé duwa nga lalaki itun nga naikumpas é Jésus, nga nailansa pé kadiya krus da. Nagsumbangir diya krus da iya abay niya krus né Jésus, ket nagkintengnga ngé Jésus.



19

Ket nagpaut to gicbet agingga ka alas trés iya gidam, ta nagpukaw met ya darang niya sinag. Ket enna Témplu, napigis met itun nga nagudduwa ngin to kurtina nga nanglinged iya uneg na. Ket é Jésus ito krus na, nagpekkaw met nga kinunen na ka nabileg, “Ama, italec ku ikew ya kararuwac,” kunen na. Ket ito nakagi na yanin, awan anges nan.



20

Ket itun, uwed isa nga toley nga nagtured nga nawé ito edyan né Gubérnadur Pilatu. Nawé ngarud nagadeng ka pammalubus né Pilatu nga alac na ya bangkay né Jesús, ta gumidam mettin. Ket yan

nga toley, ket é Husé nga taga-Arimatiya, nga isa nga mabigbig nga kunséhal diya Hudyu. Ket igina pé ya isa nga mangpadpadaan nga sinanama iya umbét nga panangituray né Apu Diyus.


21

Ket nawé ngarud ngimina ngé Husé ka luput nga maawagan ka linén. Ket ito naidasag na to bangkayin, kinubit na ito luput nga linén, sé na nipisuc iya isa nga tamen nga nailiyang ka batu.

Ket kalpasan na, nangbukalig ka dackel nga batu nga nanggiset na ito tamen.


22

Ket ito kadamlag na, itu ya Algew Ngilin nga simarunu ito Algew Panagisagana. Ket dito pangpangulu dito agsirbirbi iya Témplo, sé dito Parisiyu, nawé da naguurnung iya sangu nito Gubérnadur Pilatu.




23

Ket kinunen da, “Apu, malagip mi nga ito sibibiyag pekkem to mangal-allilaw nga toley, kinunen na nga, ‘Kalpasan nad niya tellu nga algew, agungar rac,’ kunen na met itun.”



24

“Ket iya agten iyan, nawé da ngarud. Ket nipasnec da nga tutu to panangbantay da ito tamen, nga uwed nibaldeng da nga pakadlawan da ito ruwangan na, sé pinabantayan da pé yin.”



25

Ket ito nalabes sin to Algew Ngilin, ito gibegibet pekkem iya agsapa niya Duminggu, nawé siningen dé Marya nga iMagdala sé to isa pé nga Marya to tamen. Ket ya napasamac itun, uwed met nakabilbileg nga yegyeg.



26

Ket nairana met yan iya panagdessag niya isa nga anghél né Apu Diyus manipud ka langit. Ket nawé na nibukalig to dackel nga batu nga naigiset ito tamen, ket nagtugawan nan.

Ket nagpilpilig ngarudin dito guwardiya gapu ito ansing da ito anghél, ket arig da nga natey yin.

27

Ket to anghél, kinunen na kadito babey, “Madi kayu mansing. Emmuc nga sapsapulen nu ngé Jèsus nga nailansa ito krus. Awan met idi nin. Ta nagungarin, nga agten mettas ito kinunen na. Umbét nu singen to

nakaipadaan na itun.”

28

Ket gapu ito nasingen sé nagicna dito babey, naalistu da nga pimanawin ito edyan nito tamen, nga siaansing dan, sé siaanggem da met pé yin. Ket nanagtag da nga nawé mangibaga kadito adalan né Jèsus.

29

Ket ito uwed dito babey ito dalanin, uwed met iyanin ngé Jèsus nga simabet igida. Ket kinablaawan na da. Ket imadenni da ngarud é Jèsus, nga nagparintumeng da nga nicman da diya saka na, ket nagdaydayaw da igina.

30

Ket itun, nagpasingen pé ngé Jèsus kadito sangapulu ket isa nga adalan na, ito nagsasangu da nga mangmangan. Ket dinanengdengngan na da ngarud gapu ta di da gabay ya mamati, sé gapu ta nasukir da. Ta madi da met namati iya kagi dito nakasingen igina kalpasan nito panagungar na. Ket itun, kalpasan nito pannakitbar né Apu Jèsus igida, ket naipangudu ka langitin. Ket enna langit, nagtugew iya kadayawan nga edyan, nga itu ya madiwanan né Apu Diyus.

31

Tutu met yan, ta gapu iya napalaus nga panagayat né Apu Diyus kadiya toltoley idi nga lubung, niyawat na ya kackaisu nga Anac na, tasun amin nga mamati igina, madi mapukaw, no di lugud maécdan ka agnanayun nga biyag.

54



60

32

Ruma 3:23 Ta amin tida, nagbasul tida met, ket awan dactida ya makabael nga mairaman iya nadayaw nga kasasaad né Apu Diyus.

Ruma 6:23 Ta ya supapac niya basul, ket patey. Ngem biyag nga agnanayun met nga gennung ya isagut né Apu Diyus dactida gapu iya pannakaibulun tida é Kristu Jésus nga Apu tida.

Hébriyu 9:27 Ket no dactida nga toley, sigud nga naikeddeng nga matey tida ka maménsan, ket kalpaskan na, uwed pé yin ya panangukum né Apu Diyus.

33

Epésu 2:8,9 Ta gapu was iya siaayat nga asi né Apu Diyus, ket naisalakan kayu ngarud gapu iya panamati nu. Ket ya pannakaisalakan nu, bekken ngarud nga gapu iya bukud nu nga winangel, no di lugud gapu ta nikaasi né Apu Diyus dakayu. Ta no mabalin tida nga maisalakan kuma gapu was iya winangel tida, mabalin nga uwed pagtangsit tida. Ngem bekken met nga agten iyan.

Ruma 10:9,10 Ket idi ngarud ya banag niya kagi nga ikaskasaba mi: No ibalikas mu nga ipakaemmum nga tutu nga é Jésus ya ibilang mu nga Apum, sé no patiyem iya lemlemmet mu nga igina ket pinagungar ngarud né Apu Diyus, ket maisalakan ka nad met.

Ta gapu iya panamati tida nga tumaud iya lemlemmet tida, maibilang tida nga nalinteg iya imatang né Apu Diyus. Ket sé gapu pé iya panangibalikas tida nga panangipakaemmu tida maipanggep iya panamati tida, ket maisalakan tida.

34

Juan 3:16,17 Tutu met yan, ta gapu iya napalaus nga panagayat né Apu Diyus kadiya toltoley idi nga lubung, niyawat na ya kackaisu nga Anac na, tasun amin nga mamati igina, madi mapukaw, no di lugud maécdan ka agnanayun nga biyag.

Ta nibon né Apu Diyus ya Anac na idi nga lubung tasun maisalakan kuma diya toley gapu igina, nga bekken nga tasun ukumen na da.

1 Juan 5:11-13 Ket ya banag nidi nga panangipanecne né Apu Diyus maipanggep iya Anac na, agten idi: Nécdan nactida ngé Apu Diyus ka agnanayun nga biyag, ket ya Anac na mettas ya paggayatan niyan nga biyag.

35

Matyu 26-28; Lukas 22-24; Juan 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Adasen (tiu) © 1990 New Tribes Mission, Sanford, FL
32771-1487, USA. Printed in the Philippines.

<https://www.bible.com/en-GB/bible/2812/MAT.1>

©2025 Bible for Children, Inc.

www.M1914.org www.bibleforchildren.org

36